

BOLAODI BA MEEDI BA SARS BO KGAOLEDITSE KHOKHEINE YA BOIMA BO FETANG 333KG YA BOLENG BO FETANG 167 MILLION MANE BOEMAFOFANENG BA MATJHABA BA OR TAMBO

Tshwane, 25 Phato 2026 - Ditshebeletso tsa Lekgetho tsa Afrika Borwa (SARS), ka karolo ya tsona ya Bolaodi ba Meedi le Dihlahiswa tsa Naha, kajeno di kgaolelitse khokheine ya boima bo fetang 333kg ka nako ya letsholo la phethahatso ya molao le bileng mane Boemafofaneng ba Matjhaba ba OR Tambo (ORTIA) sefofaneng se neng se tswa mane Sao Paulo, Brazil. Boleng ba khokheine ena bo akanyetswa ho ba le boleng ba mebileng ba R167 million.

Letsholo lena le ile la etswa ka nako e tshwanang dibakeng tse tharo tsa bohlokwa moo ho kenang dithoto teng, e leng moo ho laollwang dithoto tsa sefofane, moo dithoto tsa bapalami di hlahlojwang teng, le moo ho hlahlojwang merwalo teng. Ho kena dipakeng hona ke karolo ya matsapa a matla ka SARS a ho lwantshana le ho tsamaiswa ho seng molaong hwa dithethefatsi tse fetolang semelo mmoho le dithoto tse ding tse thibetsweng ka tshebediso ya madiboho a ho kena ka Afrika Borwa.

Ka nako eo ho neng ho hlahlojwa morwalo holong eo ho fihlang ba matjhabeng, Bolaodi ba Meedi bo ile ba lemoha dikotwana tse pedi tsa morwalo o kentseng khokheine. Ke paloyohle ya ditena tse 75, tsa boima ba 83.10kg, tse ileng tsa fumanwa ka hara disutukheise. Taba ena e ile ya fetisetwa hanghang ho Ditshebeletso tsa Sepolesa sa Afrika Borwa (SAPS) hore ho etswe diphuputso tse ding mmoho le tsa forensiki ho latela thomo ya bona.

Tabeng e nngwe e ka thoko, ntja e fofonelang dithethefatsi tse fetolang semelo ya SARS, *Lagertha*, e ile ya hlwaya mabokose a mane a neng a se lenaneng la semmuso la morwalo a neng a qeta ho theolwa ho tswa hona sefofaneng seo. Morwalo ona ho fumanwe o kentse khokheine ya boima ba 250kg. Setsebi sa diforensiki sa SAPS se ile sa biletswa sebakeng seo ho tla sireletsa le ho sebetsana le bopaki bona. Khokheine e fumanweng morwalong wa bapalami le moqeqekong wa dithoto o ne o tshwaile ka tsela e tshwanang e ngotsweng "Air".

Khomeshenara ya SARS Ngaka Johnstone Makhubu o boletse hore dikgaoletso tsena tsa morao tjena di pakahatsa tshebetso e phethahetseng ya mmotlolo o momahaneng wa phethahatso ya molao, o kopanyang tsa mautlwela, manollo e tswetseng pele ya

deitha, hlahlobo ya tse ka bakang kotsi, thekenoloji, mmoho le phadimeho ka bahlanka ba Bolaodi ba Meedi ba behilweng ho phatlalla le madiboho a Afrika Borwa.

"Letsholo lena le bontsha hore SARS e ntse e matlafatsa bokgoni ba yona ba ho fokisa le ho nonyetsa maqulwana a tshopodi a mokolang ka tsela e ntseng e ntlafala letsatsi le letsatsi. Diketsahalo tsa kajeno tsa phethahatso ya molao ke ka lebaka la matsholo a tsa mautlwela, tshebediso e phethahetseng ya deitha mmoho le manollo ya tse ka bakang kotsi, le phadimeho e sa thekeseleng ya bahlanka ba rona ba Bolaodi ba Meedi ba sebetsang boisu le motshehare ho sireletsa madiboho a Afrika Borwa le ikhonomi ya yona.

"Kgaoletso ena e hlophisitsweng ya khokheine ho tswa morwalong wa bapalami le o neng o le siyo lenaneng sefofaneng se le seng ho bontsha bohlokwa ba phethahatso e momahaneng ya molao. "Kgapo ka nngwe e atlehileng e thusa ho sireletsa baahi ho thefulweng ke ho mokolwa ha dithethefatsi mme e toboketsa botshepehi ba kgwebisano e molaong. Ke lakatsa ho leboha mekgatlo yohle ya phethahatso ya molao ka tshebedisano ya yona ya ho nonyetsa ho mokolwa ha dithethefatsi. Ke boela ke lebisa diteboho tsa rona ho balekane ba rona ba matjhaba ka tshebedisano ya bona ntweng e kgahlano le bonokwane bo hlophisitsweng bo fetang ka meedi ya dinaha le ho sireletsa madiboho a Afrika Borwa "

Ho fumana lesedi le fetang lena, ka kopo ikopanye le SARSMedia@sars.gov.za.

KE PHETHO